



Adresa: **Ul. Hamdije Ćemerlića 39a**
71000 Sarajevo
<http://www.voda.ba>

tel. +387 33 726 444
fax. +387 33 726 423
e – mail: info@voda.ba;

SAOPĆENJE ZA JAVNOST

S obzirom na natpise, koji su se zadnjih dana pojavili u određenim medijima o pojavi „arsena u vodotoku Željeznica“, koji javnosti daju pogrešne i alarmantne informacije o ugroženosti ljudskog zdravlja, te upućuju i pozivaju na odgovornost Agenciju za vodno područje rijeke Save Sarajevo za poslove i aktivnosti u kojima Agencija nije odgovorna i nema nadležnost, osjećamo obavezu da damo saopćenje za javnost.

Agencija za vodno područje rijeke Save" Sarajevo u skladu s članom 156. stav 2. Zakona o vodama („Službene novine Federacije BiH“, broj 70/06) na području za koje je nadležna "organizira hidrološki monitoring i monitoring kvaliteta voda, monitoring ekološkog stanja površinskih voda, monitoring podzemnih voda, priprema izvještaj o stanju voda i predlaže potrebne mjere". U okviru redovnog monitoringa površinskih voda Agencija za vodno područje rijeke Save je u prethodnom periodu, u više navrata ispitivala kvalitet vode na rijeci Željeznici na mjernom profilu Željeznica - ušće (BAS_BOS_ZELJ_1). Ispitivani su brojni fizičko-hemijski, hemijski, biološki i mikrobiološki parametri kvaliteta voda, između ostalog i arsen u rastvorenom obliku (četiri puta godišnje). Uredba o opasnim i štetnim materijama u vodama („Službene novine Federacije BiH“ br. 43/07) prepoznaje arsen kao opasnu materiju u vodama i za isti propisuje najveću dozvoljenu koncentraciju od 50 µg/L (za I-II i III i IV klasu površinskih voda). Uvidom u rezultate monitoringa iz 2007., 2009., 2013. i 2017. godine konstatovano je da ove maksimalno dozvoljene koncentracije na rijeci Željeznici nisu bile nikad prekoračene.

Godina	Rezultati (µg/L)				Mjesec uzorkovanja/analize	Prosječna godišnja koncentracija (µg/L)
2007.	<3,846	10,555	4,947		(april, juli, august)	5,81
2009.	10,00				(maj)	10,00
2013.	6,03	6,03	8,6	6,03	(mart, juni, septembar, decembar)	4,41
2017.	<3,75	6,67	44,7	13,9	(mart, maj, august, oktobar)	16,80

Također, u Odluci o karakterizaciji površinskih i podzemnih voda, referentnim uvjetima i parametrima za ocjenu stanja voda i monitoring voda (Službene novine Federacije BiH br. 01/14) arsen je prepoznat kao specifična supstanca. Vrijednosti standarda kvaliteta okoliša za arsen u pomenutoj odluci su 20 µg/L (EQS), a za interpretaciju se

uzima prosječna godišnja vrijednost. **Prema gore navedenim prosječnim godišnjim koncentracijama standardi kvaliteta okoliša za arsen, na predmetnom vodnom tijelu, tj. na ušću rijeke Željeznice u rijeku Bosnu, nisu bili prekoračeni.**

Uvidom u rezultate monitoringa kvaliteta vode rijeke Željeznice koje provodi Agencija za vodno područje rijeke Save nije utvrđeno povećano prisustvo arsena u površinskim vodnim tijelima ovog vodotoka. Ono što se procjenilo kao specifično zagađenje kod ovih subjekata je termalna kontaminacija, sulfati i hloridi i isti su se pratili/analizirali u sklopu monitoringa otpadnih voda u prethodnom periodu.

Niti jedan u medijima spomenuti pravni subjekt („Termalna rivijera“ d.o.o. Sarajevo i HBRD „Hoteli Ilidža“ d.d.) koji zahvata i koristi termomineralnu vodu na području općine Ilidža, a koju nakon korištenja ispušta u rijeku Željeznicu ne posjeduje važeću vodnu dozvolu za ispuštanje tehnoloških otpadnih voda izdatu od strane Agencije za vodno područje rijeke Save. Zahtjevi oba pravna lica podnesena Agenciji za vodno područje rijeke Save su odbačeni zaključkom iz razloga što svoj podnesak nisu dopunili traženom dokumentacijom neophodnom u postupku određivanja činjenica bitnih za donošenje odgovarajućeg vodnog akta.

Nakon saznanja dobivenih od KJKP „Vodovod i kanlizacija“ d.o.o. Sarajevo o mogućem prisustvu arsena u otpadnim vodama navedenih pravnih subjekata, posebna pažnja u postupku izdavanja vodnih akata se posvećuje i ovom zagađenju.

U periodu važenja vodne dozvole, do 2019. godine, privredni subjekat „Termalna Rivijera Ilidža“ je uredno dostavljao Izvještaje o monitoringu kvaliteta i kvantiteta tehnoloških otpadnih voda, čiji monitoring je obavljala ovlaštena laboratorija za uzorkovanje tehnoloških voda.

Iz svega navedenog želimo da naglasimo:

- *Agencija za vodno područje rijeke Save Sarajevo, sve svoje aktivnosti provodi u skladu sa Zakonom o vodama i ostalim zakonskim propisima i u potpunosti odgovorno izvršava sve svoje obaveze.*
- *Svi natpisi u kojima se Agencija za vodno područje rijeke Save Sarajevo proziva kao krivac i odgovorna za stanje u rijeci Željeznici, rezultat su neznanja i neposjedovanja provjerenih i stručnih informacija.*
- *Molimo javnost da prilikom traženja i dobivanja informacija, provjeri i izvor istih. Vrlo je važno da se informacije dobiju od nadležnih, mjerodavnih i ovlaštenih institucija. Ukoliko informaciju plasira nekompetentan izvor, šteta na taj način učinjena u javnosti je velika.*
- *Kao i uvijek do sada, za sve informacije kojima raspolaže i za koje je odgovorna, Agencija za vodno područje rijeke Save Sarajevo, stoji na raspolaganju i javnosti i medijima, a sve u cilju pravovremenog i tačnog informisanja javnosti.*


DIREKTOR
Sejad Delić, dipl.inž.